

# Critiches contra la Maratona

I teams de ziclisç amatori ai mèt sot a presciun le comitè d'organisaziun dla Maratona cun na reportaja critica sön le mensil Cicloturismo. La gauja? Cun les 20mile preiscriziuns él gnü stlüt fora passa chinescmile porsones... y tröpes scuadres amatorias de majera importanza tla Talia



Le start dla Maratona. Cun sü feter 9.000 partezipanc éra al limit.

**Turism** - Le mensil por i apasionà dla roda "Cicloturismo" se presentèia tla pröma ediziun dl ann 2009 cun na reportaja sön le dagnì dla Maratona dles Dolomites. Mo chësc iade manco cun lalé, plü cun critiches. Le comitè dla Maratona, cun a cé l'ostì Michil Costa, à albü por l'ediziun dl 2009 bëgn 20.228 pre-iscriziuns, ci che coresogn a n aumènt de chës 3.000 adejiuns respet al ann passè. De chësta meja de speranziusc n'él gnü trat fora 4.700, ci che ô di che la gran maioranza, bëgn 15.528 ziclisç, à messü gnü stlüt fora. Danter chisc n gran numer de atlec di clubs amatori ai plü rappresentatifs dla Talia.

"Maratona perchè?" Cun chësc titul déura le mensil süa reportaja, a chëra che al ti é gnü dedicè bëgn 12 plates. L'estraziun di partezipanc dan da n notar vëgn definida dal mensil na "ghigliottina" por la gran maioranza de porsones.

Cun chësta reportaja à i clubs orü se lascè fora "so senn", mo dantadöt - chësta é la impresciun - fà presciun sön le comitè dla Maratona por che al vëgnes ciarè deplü di clubs, che mëna adalerch n gröm de atlec. De chësta presciun dij Michil Costa insciö: "Por nos él saurì da tignì fora chësc druch, deache i ne se lasciun nia corumpe. Sambëgn porta i teams tröc scioldi, na buna organisaziun y na buna atmosfera, mo nos tignun pro nosta ligna."



Michil Costa, patron dla Maratona.

## Emanuele Negrini n'è nia laprò tl 2009

Danter i stlüt fora él incè l'atlet Emanuele Negrini dl Team Salieri, che à davagnè la Maratona por bëgn cin' iadi, incè la ultima ediziun. Negrini ess podü tò pert de dèrt ala Maratona, sce al s'ess presentè ales premiaziuns dl domisdé, ci che al n'è nia sciafié "por rajuns de laür", scri le mensil de ziclism. Michil Costa tol posiziu: "Sambëgn che al nes desplej da avèi messü tò chësta dezijiun, no ma ciodì che Negrini à davagnè cin' iadi la Maratona, mo incè deache al à tut pert n gröm de iadi. Nosc regolamènt é indere tler y a chël nes tignunse." Gianluca Salieri, presidènt dl team, lascia alsavèi tl mensil de ziclism che al ponsa sura sce fà na plüra cuntra le comitè. I partezipanc ala Maratona vëgn érnüs tres plü sistems. Dlungia i 4.700 trac fora dala estraziun a caje, che vëgn fata tres n sistem informatic, vëgnel incè tut sö düc chi atlec che n'è i dui agn denant nia gnüs pro (y chisc é tres deplü). Al vëgn pitè spo la posibilitè da cumprè iscriziuns a n prisc plü alt. Na pert dles iscriziuns é spo rerservades ales porsones inviadés y na pert ales porsones che prenotèia laprò incè val' dis de vacanza (ai tour operator). Chësc fat descèda n'atra critica, che vëgn da deplü perts, che la Maratona pënna massa ai scioldi.

## I taliagn se damana plü posc

I clubs taliagn se lascia incè sö che la cuota de porsones chirides fora t'estrasiun é partida sö al 50% danter taliagn y jënt da foradecà, scemia che i taliagn che à dè ite la preiscriziu é 13.000, cuntra i 7.000 da foradecà. La giornalista de Cicloturismo Pamela Pucci confrontèia Michil Costa cun la domanda sce al ne foss nia le caje da ti rerservè plü posc ai taliagn. La resposta de Costa toma fora dèr diplomatica: "Iò aprijèi la multietnicité, porchèl orunse che al sides jënt da foradecà. ... An mëss conscidré che chi da foradecà à de majeres distanzes da fà y al n'è nia dèrt che ai vëgnes penalisa. Al é bel

da avèi partezipanc da vigni pert dl monn, dal'America sciöche incè dal'Australia. Mo al é incè vèi che sce la domanda é maiù, fòssel dèrt da ti rerservè plü posc. I n'un baiarun tla proscima sentada dl comitè." Tl bojègn vëgnon incè creatifs. Y Andrea Pinarello à sciurè sön mësa la proposta da fà dōes maratones, na eventualité sön chëra che Michil Costa respogn ala giornalista: "... La Maratona ne va nia da copiè o da clonè. Al n'è nia por rajuns tecniches deache i pënsi che sce i oresson, fòsson bugn da ciafè na secunda stlüt dles strades y da mobilisè i operadus y i media por n secundo apuntamènt. Mo al é na lita de filosofia."

## La Maratona fora dl "Prestigio"?

La Maratona dles Dolomites fej pert danter l'ater dl percurs Prestigio, che tol ite indöt 10 "Granfondo" ziclistiches. I clubs critichèia che da tò pert ala Maratona él massa rì y de conseguènz a rì da podèi arjunje la partezipaziun a dōtes 10 les competiziuns dl Prestigio. I clubs amatori ai tol en conscidraziun da stlüt fora la Maratona dal Prestigio. Michil Costa: "Al foss sciode sce ai nes stlujess fora, deache le Prestigio à sigü portè pro che la Maratona gniss plü conosciüda. Ti ôje le spiné a chi che nes à daidè dan 10 agn n'è sigü nia na bela cossa."

## Michil: "N turism basè sön la roda!"

Fà dōes maratones é fora dla discussiun, aumèntè i partezipanc incè. Ci pon pa spo fà por acotentè la jënt? I damanun Michil Costa sce chësc gran numer de stlüt fora ne po nia avèi cun le tēmp conseguènz negatives por la manifestaziun? Al respogn insciö: "Sigü messunse ciafè na soluziun. Al foss da potenziè n turism che à da fà cun le ziclism. Mo çina che i ùn i jus che pè motodroms, olache auti y motors va a 100 al'ora, ne vara nia da svilupè n turism basè sön la roda. An mëss tò dezijiuns. Òna na posibilitè foss chëra da stlüt por val' ora i jus, 10 dis alungia, dan y do la Maratona." (pablo)



La pröma plata dl mensil "Cicloturismo", cun le refermènt ala Maratona dles Dolomites.

# La Maratona é öna sora

Intervista cun Claudio Canins, direttur dla Maratona dles Dolomites

Tla revista "Cicloturismo" él gnü fora la reportaja sön la Maratona, cun la chestiu dles tröpes preiscriziuns y de conseguènz esclujuns.

Al é gnü cherié chësta polemica che les maius scuadres talianes che mëna atlec é romagnüdes defora. Chëstes n'ò nia azetè le fat che ara é jüda insciö. L'estraziun vëgn fata cun dōta la trasparènz. Iò la vèighi insciö che ai à porvè tres so prestisc da fà druch sön chësta chestiu. I mëssi incè di che al é stè de val' vers na ignoranza da pert dla giornalista che à fat l'articul, deache sce an sa che i partezipanc vëgn chiris fora tres l'estraziun, spo él döt surandè tles mans dl cajo y chësc fat é da azetè.

I teams amatori ai fej presciun. Ves lascèise imprescionè? I teams porta pö incè pro al prestisc dla manifestaziun, no pa?

I ne se lasciun daldöt nia imprescionè. I ne podun nia fà desfarènzies danter na porsona singola y n atlet che vëgn da na squadra amatoriala. Vigni porsona à le medemo valor.

Spo él incè da di che chësta reportaja é stada en pert n boomerang por le foliet. Al m'è gnü dit che al é leturs che scrii döt dessenà che i teams amatori ai s'impormèt da fà chësta sort de presciun. I leturs se damana sce les scuadres mina da ester da sores. Plü lere vèighi iò che cun la reportaja él gnü cherié n cer antipatism.

Ne pol pa nia ester n boomerang por le comitè d'organisaziun, sce tan tröc - i baiun de passa chinescmile - mëss romagne a ciarè pro?

L'ann passè él stè 17.000 iscriziuns y al é gnü trat fora 5.500 posc. Chësc

ô di che un sön trèi é gnü trat fora. Al po sigü ester che al n'un sides danterite un o l'ater che se dessèna sö y ne tol nia plü pert. Al é rì da di. Iò pensà che al foss stè chësc ann manco domandes d'iscriziun, deperpo n'él stè cotantes deplü. Ci che sozedarà tl dagnì odaràn.



Claudio Canins.

Le sistem dla partezipaziun automatica por chi che ne vëgn nia pro por dui agn ne jarà gnanca plü bun sce la tendènz dles preiscriziuns va insciö inant.

Chësc sistem é bele sègn al limit. Le regolamènt gnarà mudè te dui agn. Da dailò inant podarà un tò pert de dèrt impormò do trèi agn che al ne vëgn nia pro, tanco le cuarto ann. Danterite arànse spo n ann, olache al n'è degügn che tol pert de dèrt.

Co se stàra pa cun l'aumènt de partezipanc?

Nümile partezipanc é le limit, olache nos sun bugn da pitè n bun sorvisc. I messun mantignì le standard cualitativ dèr alt. Laprò él incè na chestiu de sigurtè.

Çi dijèise pa dla proposta da fà dōes Maratones?

La Maratona é öna sora. I n'orun nia cherié na maratona de seria A y öna de seria B.

Fà na maratona dui dis indölater ne jiss nia dal punt d'odüda organisativ.

Intervista: Pablo Palfrader

# HUGS 'BAR

San Ciascian

## APRÈS SKI DISCO BAR

D.J. ARES MUSIC SELECTOR

EVENTS

MERTESC: "MOJITO" - LA SÈRA DL PERSONAL

JÛBIA: "MARACAIBO" ITALIAN & PARTY MIX

SABEDA: "HOUSE & DANCE" D.J. ARAMIS

çina ales 3 da doman

VIGNI MERCUI

"SUSHI & SASHIMI LOUNGE"

c/o Scora de Schi de San Ciascian • Info: mob. 346 98 09 184